

mettre ce qui est arriué à ce bon Sauvage, qui estoit bien capable d'ébranler la foy, si Dieu ne l'eut assisté biē particulieremēt.

[28] Il est aagé d'environ soixante ans. Au commencement qu'il fut en aage de faire des festins & d'y assister, il eut vn songe dans lequel il luy fut defendu de faire iamais festin de chien, ny souffrir qu'on luy en fist, qu'autrement malheur luy arriueroit: il auoit tousiours eu vn grand soin d'observer ce songe, iusques à ce que l'année passée au commencement de l'hyuer, estant allé en visite en quelque bourg, quelque sien amy luy desira faire festin de chien: il se souuint aussi tost de son songe, toutes-fois pensant en mesme temps qu'il estoit Chrestien & que ses songes ne luy deuoient plus estre considerables, il accepta le festin. Il ne fut pas plustost de retour à sa maison que voila vne sienne fille & vn de ses fils malades, & en fuite qui meurent. Ce coup l'esbranla, & luy fit faire le faux pas, que nous auons remarqué en la precedente Relation. Mais s'estant releué de sa cheute au bout de quelques iours, par l'assistance & les bonnes paroles de feu nostre Chrestien, qui l'ayant premierement gagné à Dieu, le regaigna derechef cette seconde [29] fois. Il nous auoit depuis dōné beaucoup de contentement, mais voicy vne occasion dans laquelle il a du tout reparé la faute de sa cheute par la fermeté de sa foy, & par la constance qu'il y a fait paroistre.

René donc vn peu apres son baptesme, se trouuant à la pesche avec nostre feu Chrestien Ioseph Chihshatenhsa; celui-cy vint à songer tout ce qui en effet luy est arriué environ quatorze mois apres. Sçauoir que trois ou quatre Iroquois l'attaquoient, que s'estant